

† Martin Schmid, Zarcuns-Tujetsch (1927–1982)

(Corr.) Ils 29 d'avrel pren Martin Schmid da Zarcuns nunspetgadamein cumiau da quest mund. La nova da sia mort derasa dapertut ella Val gronda consternaziun, era el gie appreziatus sco vischin beinvulent e capavel mistergner.

Martin Schmid ei naschius ils 11 da novembre 1927, pia da sogn Martin. Perquei ha el era survegniu quei num. A Zarcuns crescha el si en la gronda famiglia da Sep Antoni Schmid-Monn. Staus ord da scola, sedecida el da far il pur. El fa quei cun anim e tschaffen, era sche el vess probabel preferiu d'emprender in mistregn, sche las letgas fussen stadas pli grondas e las relaziuns d'autra natira.

Siu temps preferiu era la primavera, specialmein cura ch'ei era dad ir si «maises». Leu haveva il Martin buna cumpignia cun siu amitg Gebhard Berther e cun ses convischins Vigeli Berther, Vigeli Monn e Gion Andriu Berther. Las seras caudas ed emperneivlas vegnev'e magliau la pulenta ordaviert sil Crest. Silsuenter schavan ils musicants resunar melodias romanticas sur la Val. Quei era bellezia! Il trumbettist Martin sedeva probabel speciala breigia per dar sinzur a sia matta preferida, alla Stefania Monn da Sedrun. Ina primavera vegn ella da sogn Pieder e sogn Paul a magliar groma ed igl unviern sissu davantan els ventireivels consorti. Denton, sco dapertut sebrattan era en lur lètg sulegl ed umbriva. Igl atun 1962 ha il Martin in grev accident cun sia maschina agricola. Legreivlamein serevegn el pulit da quei discletg. Ei resta denton anavos ina invaliditat ch'impedescha el tier la strengta lauvr da pur.

Igl unviern luvrava el en ina fätschenta da skis ed igl ulterior temps surpriseva el differents «accords». Il Martin era in um fetg inschignus. El saveva far lavurs empau da tuttas uisas. Sper sia casa haveva el baghegiau ina pintga scrinaria. Ina perdetga da siu dun ei per exempli la biala fontauna a Zarcuns. Era uonn haveva il Martin occupazion detgavunda ed el haveva entschiet cun tschaffen ed ardiment ses «projects». Deplorabla mein ha ina daguota tschuncanau ses plans.



Il temps liber – il pauc ch'el lubeva a sesez – steva il Martin il pli bugen el ravugl da sia famiglia. El era in bien bab e consort. Perquei vegn el a mun car il pli fetg a casia. Denton era ses parents, amitgs ed enconuschents laian encrescher per el. Nus lein mantener il Martin en buna memoria sco bien carstgaun e giavischein ad el la pasch eterna.

Success professiunal

(Comm.) A caschun dils davos examens finals per emprendists a Cuera, ha il giuven *Pius Caduff*, fegl da Cristian e Pia Caduff-Derungs, Degen, terminau cun fetg bien success igl examen da construider d'utensils. Igl emprendissadi ha el absolviu tier la firma Grob SA a Cuera. – Nus gratulein da cor al simpatic giuven, giavischond ad el success e cuntentientscha en sia clamada.

Success ella clamada

(Comm.) Sco ei vegn gest annunziau, ha il giuven *Giachen Lombriser*, fegl da Victorin e Giuseppa Lombriser-Candinas, Trun, fatg cun bien success igl examen da dessignader da construzion auta. Igl emprendissadi da 4 onns ha el absolviu tier la Viafier Retica a Cuera. Duront il medem temps ha el era frequentau la scola media da diplom, ch'el ha medemaine terminau cun fetg bien success.